

# Powšitkowne WOZJEWJENJA

njedźelu, 24. februara 2013

## **Slěbornu biskopsku róčnicu woswjeći w Smochćicach**

Składnostnje 25. róčnicy swojeje biskopskeje swjećizny woswjeći emeritowany biskop Joachim Reinelt ze swojimi duchownymi sobubratrami a ludom Božim džaknu Božu mšu pónđzelu, 25. februara, w 11.00 hodž. w Domje biskopa Bena w Smochćicach. Wšitcy wěriwi su na nju přeprošeni.

## **„Tam so dótkatej njebo a zemja ...“**

Lětuši rjad ekumeniskich póstnych seminarow w Smochčanskim Domje biskopa Bena steji pod heslom „Tam so dótkatej njebo a zemja ...“. Pónđzelu, 25. februara, budže awtor a žurnalist Jürgen Israel k temje „Njewuprajomne zwuraznić“ přednošować. Temje „Zwonka wšěch wobrazow molować“ wěnujetaj so pónđzelu, 4. měrca, Sylvia Vandermeer a Ralf Reimann. Z literariskim programom „Štó da trjeba jandžela?“ z „Theaterkompanie Leipzig“ so pónđzelu, 11. měrca, lětuši rjad póstnych seminarow zakónči. Započatk je stajnje w 19.30 hodž. Mjez sobuzarjadowarjami je Towarstwo Cyrila a Metoda z.t.

## **Za putnikowanje Serbow na Morawu so bórže přizjewić**

Składnostnje 1.150. róčnicy přichada swjateju Cyrila a Metoda na Morawu planuje Towarstwo Cyrila a Metoda z.t. (TCM) wot štwórtka do njedźele, 4. do 7. julija, putnikowanje wěriwych ze serbskich wosadow na Velehrad. Na swjatočnu Božu mšu pjatk, 5. julija, je tež bamž přeprošeny. Nadrobniše informacije so hišće wozjewja. Płaćizna wučinja z połpensiju dohromady 195 eurow. Štóž ma zajim, so na tutym putnikowanju na Morawu wobdželić, njech so skazanja hotela dla hač do pjatka, 15. měrca, w redakciji Katolskeho Posoła přizjewi, telefonowe čisło (0 35 91) 55 02 12.

## **„Na zapokazanje biskopa Kocha do Drježdźan**

Na Božu mšu ze zapokazanjom noweho Drježdźansko-Mišnjanskeho biskopa Heinerja Kocha su wšitcy wěriwi sobotu, 16. měrca, w 10 hodž. do Drježdźanskeje katedrale přeprošeni. Štóž w cyrkwi hižo městno njenańdže, změje składnosć, Božu mšu na Hrodowym naměsće na widejowej scěnje scěhować. Telewizija MDR tutu Božu mšu live přenese. Wjace pokiwow pod [www.posol.de](http://www.posol.de)

## **Pěši do Częstochowy**

Tež lětsa pozbudža farar Beno Jakubaš, so w serbskej skupinje na putnikowanje z Waršawy do Częstochowy podać. Hić smě kóždy sobu, kotryž je 18. žiwjenske lěto docpěl. Termin putnikowanja je wot 5. do 15. awgusta. Zajimcy njech so bórže přizjewja pola fararja Bena Jakubaša w Njebjelčicach, telefonowe čisło (0 35 78) 30 20 05.

## **Putniska jězba z busom do sewjerneje Italskeje**

Lětuša putniska jězba wot soboty hač do štwórtka, 14. do 19. septembra, powjedže nas do sewjerneje Italskeje. Hłowny cil je město swjateho Antonija, Padua, hdžež je tež jeho row. Wobhladać chcemy sej mjez druhim město Verona, wokolinu Gardaskeho jězora, hdžež budžemy přenocować. Wopytamy tohorunja hnadowne městno Madonna della Corona. Dalše informacije dóstanjeće pod telefonowym čislom (03 57 96) 9 40 37.

*Matthias Hadank*

## Młodzina za křižom z Kukowskeho hrodzišća přez póstny čas

W póstnym času su młodostni lětsa přeprašeni so při křižu z Kukowskeho hrodzišća schadźować k modlenju a rozpominanju. Křiž bu lěta 1984 na Kukowskim hrodzišću postajeny a zwjazuje wot toho časa wosebje młodziny ze zbóžnym martrarjom, kapłanom Alojsom. Po tym, zo křiž přez naše wosady scěhujemy, chcemy jón zaso na nasypje Kukowskeho hrodzišća postajić.

Naš póstny puć zahajimy w Ralbicach, hdžež so křiž tuchwilu česćuje. Zakónčimy póstny puć z křižowym pućom dekanatneje młodziny bołmončku w Chróscicach. Tam křiž nachwilnje wostanje, doniž jón na hrodzišćo njedonjesemy.

### Přehlad zarjadowanjow w póstnym času

**sobotu, 2. měrca**, w 19.30 hodź., Pěskecy, kapałka

start a přewod křiža z awtami a motorskimi do Worklec, tu je w 20.00 hodź. komplet, po tym zetkanje w Don Boskowym domje

**sobotu, 9. měrca**, w 19.30 hodź., Worklecy, kapałka

start a přewod křiža z awtami a motorskimi do Zdžěrje, tu je w 20.00 hodź. komplet

**sobotu, 16. měrca**, w 19.30 hodź., Zdžěr, cyrkej

start a přewod křiža z awtami a motorskimi do Dobrošic, tu je w 20.00 hodź. komplet, po tym modlenje před Najswjećišim

**sobotu, 23. měrca**, w 19.30 hodź., Dobrošicy, kapałka

start a přewod křiža z awtami a motorskimi do Chróscic, tu je w 20.00 hodź. komplet, po tym přiležnosć k swjatej spowědži

**njedźelu, 24. měrca**, w 14.00 hodź., Chróscicy – křižowy puć dekanatneje młodziny

*Farar Měrcin Deleńk, dekanatny młodzinski dušepastyr*

## Hdyž rentnarjo zapřimnu“

Chróšćanska serbska lajska dźiwadłowa skupina přeprašuje na poslednje předstajenje kriminalneje komedije „Hdyž rentnarjo zapřimnu“. Wone budže tutu njedźelu, 24. februara, w 15.30 hodź. w Radworskej „Meji“.